

**AKASHVANI AIZAWL**

**REGIONAL NEWS UNIT**

**(MIDDAY)**



**IGNOU CONVOCATION**

Indira Gandhi National Open University chuan vawiin khan India ram hmun hrang hranga IGNOU Regional Centre thlan bik 39-ah zirlai pass tharte hnena certificate hlanna hun, Convocation vawi 39-na an hmang a; IGNOU Regional Centre, Aizawl atangin mi 1,200-in degree an nei thar.

IGNOU Convocation hi New Delhi-a IGNOU hmunpuiah India Vice President CP Radhakrishnan hovin hman a ni a; IGNOU Regional Centre, Aizawl atangin NIT, Mizoram director Prof. Dr. S. Sundar hoin zirlai leh zirtirtuten video conferencing hmangin an chhim a ni.

Aizawla convocation hmanpuitu NIT Mizoram Director Prof Dr S Sundar chuan zirlai degree nei tharte a lawmpui thu sawiin, an thiamna leh theihnate tipunga India ram hmasawn zel nan theihtawp chhuah turin a chah a ni.

Convocation vawi 39-naah hian IGNOU Regional Centre Aizawla zirlai 1200 in degree an nei thar a, master degree nei thar 501, bachelor degree nei thar mi 624, postgraduate diploma 2, diploma 12 leh certificate programme learner 49 an ni.



**WORLD HEALTH DAY**

Vawiin April ni 7, Thawhlehi hi hriselna kawnga khawvel puma inzirtirna ni 'World Health Day' a ni a; thupui atan 'Together for Health, Stand with Science' tih hman a ni.

Kumin World Health Day hian a tum ber chu science thiamna behchhana zirchianna leh thil hmuhchhuahte kaltlanga mihring bakah nungcha leh ramngaw hrisel neih kawnga hmalak a ni a; science thiamna hmanga hriselna kaihhnawih inngahna tlak inenkawlna tha siamte, sawrkar leh pawl anga science thiamna hman tangkai theihna tura hmalak te leh mipuiin science thiamna an ringamna tura hmalak leh inzirtirte chu a tum tlangpui an ni.

World Health Day hi World Health Orga-nisation (WHO)-in day a puan 11 zinga pakhat a ni a; kum 1948-a WHO inkhawmpui chuan World Health Day hi kum tin April ni 7-a hman thin turin a rel a, kum 1950 atangin hman tan a ni.

Vairengte-a Counter Insurgency and Jungle Warfare School te chuan World Health Day pualin vawiin khan Vairengte a Army Public School Naupang U-KG atanga Class -8 thleng te tan a thlawna inentirna Medical Camp buatsaih in Medical Health Checkup an neihpui a. He hunah hian M.I room Doctor ten naupangte hrisel na kawng hrang hrang endik sakna neiin a mamawh tan a thlawnin damdawi an pe baw a ni.



**OIL PALM**

Vawiin khan District Agriculture Office Lunglei district buatsaihin Bualte farm ah district chhunga bial hrang hrang enkawl leh viltu turte tan Tung chin dan training buatsaih a ni.

Vawiina hun hmanah hian a chin dan hrang hrang bakah a enkawl zui dan zir ho a ni a, training-a tel te hian anmahni bialchhung theuhah tung chin dan diktaka kalpui a nih theih nan zirtirna pe chhawngin an bial theuh an vil leh dawn a ni.

District Agriculture Office hian NMEO Oilseeds Tree Borne oilseeds scheme hnuaiiah tin sangkhat chuang hmunah hma a la chho mek baw.



## CHAMPHAI DIST CONSULTATIVE COMMITTEE

Vawiin khan Champhai DC Conference Hall, Keifangtlangah Champhai Bawrsap Pu Mohammad Aaquib hovin nikum October leh December inkara bank hnathawh dan leh hmalakna hrang hrang endik turin District Consultative Committee, District Level Review Committee leh District Level Security Committee an thukhawm.

Thukhawmah hian bank an invenhim dan te endik niin Mizoram Rural Bank, Ruantlang Branch chu security guard an neih theih dan ngaihtuah tura hrilh an ni a. Loan pek thuah CD Ratio zaa sawmruk (60%) pha lo hrang hrang te hnen atangin a chhan zawhfiah a ni a, tihthat nan Financial Literacy Campaign neih hnem a tul thu sawi niin bank manager te FLC nei hnem tura chah an ni a, quarter khatah pathum (3) tal nei tura hriattir an ni.

Agriculture leh horticulture bakah Animal husbandry leh social security hnuai loan pek chhuah zat endik a ni a, bank hrang hrang tihthatna leh hmasawn ngaihna te tarlan a ni. He hunah hian Chairman Pu Mohammad Aaquib chuan Potential Linked Credit Plan 2026-27 a tlangzarh bawh a ni.

He hunah hian NABARD leh RBI regional office hotute, Champhai District-a bank hrang hrang branch manager leh line department hotute an tel a ni.



### OIL & GAS

Mizoram Sorkar chuan khawthlang ram indona thleng mek avanga eirawngbawlina Gas leh tuialhthei-a harsatna thleng thei lakah Mizoram Sorkar chuan ngawrh takin hma a la reng a. Tun dinhmunah eirawngbawlina Gas leh tuialhthei chu Mizoramah a thleng tha a, mipui tan chiai-na tur a awm lo tih an sawi.

Sawrkar tarlan danin nimin April ni 6 thleng khan Mizorama LPG Distributor hrang hrangah Domestic (14.2Kg) bur 13,801 a awm a, kawng laka thang mek bur 26,187 nen a vaiin bur 39,988 awm ang a ni a. Commercial (19Kg) chu Distributor-ten bur 512 an kawh bakah kawng laka thang mek nen avaiin bur 824 a awm a. Petrol pawl Filling Station-ah Kilolitre 1,392.3 awmin, kawng laka thang mek Kilolitre 351 nen a vaiin Kilolitre 1,743.3 awm ang a ni a. Diesel chu Filling Station-a Kilolitre 1,546.2 awmsa bakah kawng laka thang mek Kilolitre 435 nen a vaiin Kilolitre 1,981.2 awm ang a ni.

### (Desk)



### DRUG DISPOSED

Nimin khan Lunglei AP Tlanga Incinerator Centre-ah Lunglei District Disposal Committee chuan ruihhlo (heroin no. 4) gram 51 (₹18,88,400/- man hu) an hal ral.

Ruihhlo hal ralnaah hian DDC member-te an tel a. Ruihhlo hal ral tak hi Lunglei Police Station-a ND&PS Act hnuai case ziah luh niin, Lunglei Judicial Magistrate First Class-I-in phalna a pek anga hal ral a ni.

### (DIPR)

